

適園叢書

張宗祥



通國書香

吳昌碩



唐大詔令集卷第一百二十五

宋敏求編

政事

平亂下

平張韶德音

破李同捷德音

誅興元亂兵敕

誅王涯鄭注後德音

誅王涯等德音

誅王涯等告諸陵詔

平潞州德音

平徐州制

平楊師立詔

平楊師立宣示中外詔

平孫儒德音

平楊守亮等敕

平亂下

平張韶德音

朕祇荷大構屬當沖眇九廟之嚴因子以輕重四海之大由
我以慘舒每懷推誠不敢自用大布利澤嘉聞讜言庶無愆
尤少釋重負豈虞信不及於物德不動於人以懷晏安遭此
寇亂張韶蘇元明等驅率工徒劫攜兵刃白晝竊發暴犯宮

聞震驚朕躬近幸禁壘卽時勒五營騎士七萃熊羆少命偏
師纔分左廣自申及酉撲滅皆盡斯實上玄降鑒宗社垂休
愍予冲人俾無顛覆其兩軍立功將士已節級優賞諸將校
其口部領軍士者委有司條流甄獎其名聞奏其逆賊親屬
同知情之外一切不用追擾尙恐因緣仇隙告訴平人自今
以後縱爲妖黨有小詿誤者並許自新亦不須勘問嗚呼秦
皇車碎於博浪漢祖心動於柏人或不悟而終亡或自新而
流祚齊晉多難而啟國衛邢無難而喪邦蓋謂憂勤則福興
安肆則禍稔天其意者警於予乎而今而後知玄貺可以德
歸神器難乎力恃咨爾股肱輔臣庶寮百辟洎方郡侯伯有
位之士無或棄予謂不可教其有違道傷理徇欲懷安面刺

庭攻無有隱諱成王之紹文統武帝之開高業皆莅祚日早
享國歲深夫豈他哉蓋大臣維之而不跌無羞於二王者繁
爾多士乎

破李同捷德音

敕王者誅暴亂弔傷殘明賞報功拯弊綏眾蓋爲邦之大紀
也李同捷頃自先朝擅謀專土輒抗成命私行墨綬暨朕臨
御實思含垢授之以充海諭之以詔書使臣相望凶妄自若
而更挺妖結黨劫眾阻兵毒流無辜害被闔境由是藩臣歷
懇卿士獻規至於興戈諒非得已白元戎環壤王旅進攻卯
窺危巢颯振槁葉動必乘其機會退皆扼其咽喉故戴義啟
入郭之殊庸李祐展平城之勝略累稔逋寇一朝削平此誠

天人合符中外協力永言勳效無忘寤思其戴義及李祐應
加爵命并幽州及齊德兩道行營將士各有賞賜並已從別
敕處分其賜物仍委度支逐便速與支送仍命使臣分往宣
慰各於當處厚加宴勞其立功軍將未經寵授者委戴義李
祐卽差次等第速具聞奏卽有甄獎用答勲勤李同捷力屈
計窮方圖轉禍朕好生存性初議貸刑而面縛在途陰懷狡
計夜縱火號潛誘家童更謀網漏自速梟誅憫彼凶魁坐沈
家族顧茲貽戚載軫予懷其母孫氏妻崔氏并男及家口等
並宜特從寬宥令於湖南管内諸州容有寬閒處安置其將
卒不涉翻覆者委戴義李祐審加勘實各與衣糧分配驅使
其滄景等州將士有謀執凶黨竟遭誅夷或雖被招致能全

名節者並委李祐按實條奏量予贈錄其滄景德棣等四州百姓有是近日被賊點召團結者並放歸農除非同惡相濟以死拒命者餘一切不問四州百姓久陷汚俗每罹威虐莫非吾人今旣脫難當施德令並宜給復一年不能自存者量給種食刺史縣令仍令中書門下慎擇循良俾加存撫應諸將校自經戰伐或致死亡載念捐軀每深憫歎並委戴義李祐審加勘定具名銜事迹申奏卽與褒贈其長行官健陣亡者並令所在長吏量與收葬同爲祭醑其有家口者各委本軍優卹仍三年勿絕糧賜其有因中矢石遂致殘廢者各委本軍厚加存養仍給衣糧終身不絕敕旨有未該者委李祐戴義比類更作條件奏聞其昭義義武等軍行營在賊境者

比相犄角皆有功勤各別有處分嗚呼整師除害義切於安人撫俗策勳道存於布澤爰申彝典且乂新邦咨爾多士宜悉朕意

大和二年五月十二日

誅興元亂兵敕

乃者蠻寇入犯蜀川令興元招募一千人隨事防遏雲蠻旣退設賞放歸事理之閒亦爲得所姦臣犯紀戕害元戎遂擇新帥委之窮竟果副朕意盡誅羣凶八百餘人一時梟斬并諸叛將同日誅夷省狀念功嗟賞何極其衛志忠以下將吏等委溫造節級分付訖聞奏王景延等以李絳遇害時皆能輕身殉節奮不顧生宜委中書門下卽與褒贈其王延仍與一子官兼委溫造優卹家事務令得所宣示中外咸使知聞

唐大言集卷一百二十五
四
聞大和五年
八月一日

誅王涯鄭注後德音

門下朕以翼翼之心孜孜求理十年之內庶政未寧故焦勞
心志博采眾說聿親奇士冀獲長才取其節焉不顧發迹故
李訓鄭注咸得進言既望沃心每許造膝邪人姦色順非而
澤信行聽言深心厚貌包藏不怍僞辨無疑梟獍爲心禍亂
忽作意欲翦除中外悉去大臣志願非常自謀安泰賴上天
垂祐宗社降靈同惡雖多姦謀竟敗忠臣輸力保護朕躬是
日弭寧已嘗布告尙聞閭里未悉予心猶有浮言謬相誑惑
朕君臣之際疑聞不行致此妖狂慚非哲惠前月二十一日
王涯賈餗舒元興李訓鄭注李孝本韓約羅立言王播郭行

餘魏逢等親率金吾兵仗又郭行餘王播領部下將健持兵
上殿協謀不軌傾覆社稷謀害中外凡此凶徒悉已梟戮絕
其餘類以謝忠良內外庶臣卿士百辟體予前志宜卽自安
無惑浮言尙相恐怖聿式唯新之慶宜申在宥之恩在京百
司見禁囚徒流死罪遞減一等未結正者推問畢日準此處
分諸色所由官吏陷於脅從雖有名籍涉於註誤者一切不
用更問仍付左右神營兩金吾京兆尹御史臺並準恩赦處
分休更追捕其有潛藏迴避者限日令出各歸本司罪人親
族已處置外其餘周親以上一切不問所在更不用繫留聞
報其先有定名捕捉者所在尋逐獲日聞奏不得漏網昨者
有擅入逆人之家盜掠財物擁無故之利生怙亂之心尙猶

縱酒聚徒妖言惑眾志於掠盜恐嚇居人假託軍司輒持兵器及以前月二十一日事妄相告訴者委御史臺京兆府嚴加伺察禽捉奏聞所在決殺不在恩赦之限嗚呼齊晉之難桓文是興注訓之妖朕志先定識邪正之路辨消長之端覩眾臣宣力於急難見禁旅摧凶於頃刻當時危之際識臣節之勤藏之於心何日可忘宣示中外宜體朕言

太和九年十二月

給事中臣承瑕等言臣聞千紀之臣竊發之寇三代以降不能無之陛下御謀神斷電擊天誅刑雖愼卹人鮮幸生躬夏禹泣辜之心行成湯解網之惠納隍軫慮釋縛惠仁渙汗旁流殊私遐布旬月之間再有恩蕩有以見陛下愍物之心也而又大啟刑書除詔中外不疵小過思擴大猷雖法設狴牢

物無維繫咸許自新與之更始好生之德達於上玄含垢之恩洽於下土用和在宥乃聖人之心去殺勝殘固賢者之事歲聿云暮節及春陽順覆載發生之始敷雷雨作解之時則率土同心孰不欣幸臣等忝居近侍獲覩德音無任忭躍慶悅之至謹奉制書如右請奉制付外施行謹言

誅王涯等德音

朕以寡德祇荷睿圖於茲十年夙夜寅畏恐至誠不達景化未敷屈已以安四方推信以待百辟不謂患生毗倚變起姦凶亦以失於任人致此氛祲朕爲人父母子育生靈憂萬姓之靡寧懼一物之失所況至理之代先德而後刑所以上下欣康中外清晏慮有連累卽傷太和且賞不踰時式彰褒勸

其今月二十一日排難宣力功成謀議及能梟斬鄭注者節級各加官賞其次立功及卓隊將士合在賞給者卽有等差處分其將校等各與改轉委本軍條流具名聞奏謀逆之人已斷腰領子戮家破俾當極誅元惡與李訓鄭注王涯家族除已處置外妻女奴婢並入官資貨產業天下所在切加檢責據數聞奏其餘親黨除同居知情外不同謀者一切不問諸色官吏所由其日受逆長指令欲出力同惡者並以兩軍推問尋捕處斬訖尙慮因緣仇隙妄告平人自今以後縱同官司微涉詿誤一切不問潛藏疑懼者許三日內各歸本司不得輒相恐動韓約首爲詐惡逆罪滔天雖羅捕未獲終天網不漏宜委御史臺京兆尹兩金吾速催促所由齊出搜索

獲日聞奏如輒有人隱藏不告者罪及一門如知去處隱藏密來告說者必有厚賞嗚呼求理之心唯才是與聽言信行不慮包藏豈謂邪人負我如此其中誘陷必有脅從須挂州名載深冤歎其中節目疏理未盡須更商量者委中書門下續卽條奏宣示遠邇咸使聞知

誅王涯等告諸陵詔

敕凶徒竊發震駭京師中外協心卽時禽斬昨者將戮叛黨咸告廟社國之大事合謁諸陵宜令所司卽擇日撰儀差官奠告

大和九年十一月

平潞州德音

門下朕聞覆載之內逆命者必滅其身日月所臨亂常者必

覆其族矧有恩辜亭毒禮背君親罪惡貫盈人神共棄咎將
自執禍豈能逃逆賊劉稹包祖父之姦謀肆豺狼之很戾動
干紀律力逞凶頑招亡命而爲腹心憑山川而爲險固脅從
百姓殘忍一方積惡成殃擢髮難數朕躬承寶位祇畏上天
每戒佳兵常思去殺然事關除暴理合興師遂命戎臣會兵
攻伐鼙鼓雷霆之怒戈鋌原野之誅惡黨旣誅元凶就戮載
馳驛騎傳首上聞又獻捷音降書繼至是用丕變弊俗洗蕩
妖氛式布新恩獲全舊土念彼戰爭之地適當凋瘵之餘租
稅且蠲征徭合減其澤潞五州共給復一年河南府當路縣
太原府及接昭義界縣河陽懷州陝晉絳及當路州縣今年
秋稅並宜放免酬忠旌善爵賞宜加其行營立功節度使並

別敕處分其大將以下委本道各具功效聞奏續有處分諸道行營咸盡忠力至於攻取剋捷屢聞應緣討伐將士歸還之際並有優賞已從別敕處分離鄉征役固有勤勞臨陣殺傷寧無殞歿行魏祖弔魂之禮施周文葬骨之仁其行營將士陣亡者先已有敕便令子弟填替如無填替三年不停衣糧有因戰陣傷損手足永廢者終身並不得停衣糧陣歿將士骸骨先令所在埋瘞不許便令將歸今已事平如家口遷取委所在州縣量事應接發遣如無親屬來取者重與改瘞勿令暴露仍與設祭諸道行營陷沒將士見在昭義者各放歸本道其澤潞五州百姓先因用兵逃散在諸處者委元達弘敬劉沔元式石雄安存發遣各令歸業仍委盧鈞設法招